

白樂天文集卷之二十九

碑文

淮南節度使檢校尚書右僕射趙郡李公家
廟碑銘并序



王建侯侯建廟廟有器器有銘所以論譔先德明
著後代或書于鼎或文于碑古今之通制也維開
成某年某月某日宣武軍節度使檢校尚書右僕
射汴州刺史上柱國賜紫金魚袋趙郡李公齊沐
祇慄拜章上言請立先廟以奉常祀於是得請于

天子承式于有司是歲某月某日經始于東都明
年某月某日有事于新廟外盡其物內盡其志三
獻百順神格禮成其友居易以李氏宗祖世家名
爵與僕射志行官業書於嚴生之碑謹按家略九
代祖善權後魏譙郡守八代祖迺觀徐梁二州刺
史七代祖續某郡太守六代祖顯達隨潁川刺史
五代祖遷皇朝某某二州別駕贈德州刺史高祖
孝卿右散騎常侍贈鄧州刺史曾祖府君諱敬玄
總章儀鳳閑厯吏部尚書同中書門下三品中書

令弘文館大學士監修國史封趙國公謚曰文獻
才智職業載在國史令祭于第一室妣蒯國夫人
范陽盧氏配焉王父府君諱守一屬世難家故不
求聞達避榮樂道與時浮沉終成都府郫縣令祭
于第二室以妣滎陽夫人鄭氏配焉先考府君諱
晤厯金壇烏程晉陵三縣令府君為人篤於義行
飾以吏事動有常度居無惰容所蒞之所不為
辭滿之日多遺愛不登貴任其命矣夫今祭于第
三室以先妣上國夫人范陽盧氏配焉府君累贈

尚書右僕射夫人累贈至上谷郡太夫人前後凡
三追命六言第渥澤疊洽自葉流根從子貴也邠
縣泉晉陵府君成善積于躬道屈於位儲祉流慶
而僕射生焉僕射名紳字公岳六歲丁晉陵府君
憂孺慕號泣如成人禮九歲終制孝養上谷太夫
人年雖幼承順無違家雖貧甘旨無闕侍親之疾
冠帶不解者三載餘可知也執親之喪水漿不入
口者五日餘可知也先是祖妣晉陵府君先娶夫人裴氏無子早卒
伯叔父兄弟之歿咸未歸祔各處一方公在斬練

中親護九喪匍匐萬里及期喪事禮無闕違至誠
感神有靈烏瑞芝之應事動鄉里名聞公卿言孝
反者以為表率憲宗嗣統三年李錡盜據京口公
寓居無錫曾擢第東歸錡聞公名署職引用初詢
以謀畫箝舌不對次強以章檄絕筆不書誘之以
厚利不從追之以淫刑不動將戮辱者數四就幽
囚者七旬誠貫神明有死無二言名節者以為準
程朝廷嘉之拜右拾遺歲餘穆宗知公忠孝文行
召入翰林特授司封員外郎知制誥遷中書舍人

承顏造膝知無不言獻替啓沃如石投水俄拜御
史中丞戶部侍郎既而望屬台衡朝當晏駕時移
世變遂出椽高要佐潯陽旋為滁壽二州刺史大
凡公之為政者應用無方所居必化卧理二郡以
去害為先故有盜奔獸依之感廉察浙右以分憂
為切故有卹鄰活殍之惠尹正河洛以革弊為急
故有摘奸扶蠹之威文宗知公全才知汴難理乃
授鉄鉞俾鎮綏之初宣武師人驕強狠悍犷亂徼
利積日生常公既下車盡知情偽刑賞信惠合以

為用一年而下懲勸二年而下服畏三年而下恥
格肅然丕變薰然大和撫之五年人俗歸厚至於
捍大患禦大災却飛蝗遏暴水致歲於豐稔免人
於墊溺噫微公之力汴之民其為殍乎其為魚乎
殊績尤課不可具舉天下征鎮淮海為大非公作
帥不足以長東諸侯制加銀青光祿大夫揚州長
史淮南諸道節度觀察等使餘如故詔下之日出
次于外軍門不擊柝里巷無吠犬從容五日按節
而東百姓三軍挈壺漿捧葦醪遮道攀餞者動以

萬輩皆嗚咽流淚如嬰兒之別慈母焉噫若非襦
袴之惠及其幼鷄豚之養及其老又推赤心置人
腹中者則安能化暴戾之俗一至於此乎西人泣
送東人歡迎梁楚千里風交化移膏雨景星所至
蒙福于時開成會昌之際上方致理公未登庸頤
頤蒼生環望而已盛矣哉大丈夫生於世也以忠
貞奉於君以義利惠乎人以黻冕貴乎身以宗廟
顯乎世以法交乎神宜其荷百祿輔一德為
唐之宗臣方然君子謂李氏之廟也休哉公之

也順哉然曰有孫如此有子如此可謂孝也故其
碑銘云

祭祀從貴爵土有秩諸侯之廟一宮三室皇皇西宿
皇祖中書孝孫追遠昭穆有初顯顯中室王父郡令
順孫祇享盡慤盡敬肅肅專室先考晉陳應一舉薦
孝思蒸蒸嗣子其誰僕射公垂公垂翼翼齊嚴諒直
為子為忠有典有則載膺休命載踐右職以孝肥家
以忠肥國乃授侯伯縣鉞折戟乃饗祖禰乃生恭授
家聲振耀國典褒飾六命徽章三朝血食光大遺嗣

顯暴先德子孫承之垂裕無極

唐故湖州長城縣令贈戶部侍郎博陵崔府

君神道碑銘

公諱亨字某古太微胤也今博陵人也唐虞之際因
生為姜姓暨周封齊分類曰崔氏長源遠派大族清
門珪組賢俊準繩濟美斯崔氏所以綿千祀而甲百
族也隋散騎常侍諱洽公六代祖也唐貞州武強令
諱紹曾祖也監察御史諱預王父也常州江陰令育
公考也公幼以門蔭子補太廟齋郎初調授汝州葉

縣尉再調改宋州單父尉時天寶末盜起燕薊毒流
梁宋屠城殺吏如火燎原單父之民將墜塗炭公感
激奮發仗順興兵挫敗賊徒保全鄉縣拳勇之旅歸
之如雲方欲紀合貔虎毆誅蛇豕京觀群盜金湯一
方本道節度使竒之將議上聞會有同事者爭功陰
相傾奪公超然脫屣遂以疾行東游江淮安時俟命
屬吳王出閣領鎮求才撫人常聞公名試以吏事遂
表請為宋城尉事舉移假漣水令賞緋魚袋縣政脩
轉常州錄事參軍糾察課程浙東採訪使聞之奏授

越州餘姚令吏畏人悅歲未滿浙西採訪使知之奏
湖州長城令長城之理又加於前二邑爲政成秩滿
解印罷去優游自得獨善其身興元元年疾歿於東
大和五年遷塋於洛享年若干詔贈尚書戶部侍郎
夫人隴西李氏追封岐國夫人皆從子貴也公爲人
儀表魁梧氣槩惆儻負不羈之才慕非常之功始發
軼於單父志立而功不就終統駕於長城道行而位
不達善慶所積實生司空司空諱弘禮公之幼子也
以學發身以文飾吏以幹蠱克家以忠壯許國典十

郡領二鎮再釐東土追命上公雖天與之才國與之
位亦由公義方之訓輔而成焉大丈夫貯蓄財術則
置功利鎡基富貴焯耀家邦不當其身而得於後父
折子荷相去幾何嗚呼崔公何不足之有國典官五
品已上墓廟得立碑又按喪祭令凡諸贈官得同正
官之制其孫彥防彥左等奉父命述祖德揭石于墓
勒銘于碑銘曰

天無全功賢無全福既享天爵難兼世祿矯矯崔公
道積厥躬大志長略卷于懷中黃綬遏寇思奮奇功

銅印字人躬行古風才位高下步濶塗窮竟戢羽翮
不展心胷天道有知善積成鍾昭哉報施其在司空

大唐泗州開元寺臨壇建德徐泗濠三郡僧

正明遠太師塔碑銘

娑婆世界中有釋迦如來出為上首如來滅後世界
中或羅漢僧或菩薩僧在在處處出為上首佛道未
喪間生其人故泗州開元寺臨壇建德太師實一方
上首也太師譙郡鄴人世姓暴氏僧號明遠七歲依
本郡霈禪師出家十九從泗州靈穆律師受具戒王

夏通四分律俱舍論乃陞講座乃登戒壇元和元年
衆請充當寺上座明年官補為本州僧正統十二年
開元寺北地二百步作講堂七間僧院六所淮泗間
地早多為潦歲有水害師與郡守蘇遇等謀於沙湖
西際地創避水僧坊建門廊廳堂厨廩二百間修松
杉楠檜檜一萬本由是僧與民無墊溺患旋屬災災
本寺寺鐵像滅僧潰者數年師與徐州節度使三侍
中齊緣侍中名遂合願叶力再造寺宇乃請師為三
郡僧正奏乞連置戒壇因其施利即其規度侍中又

以家財萬計助而成之自殿閣堂亭廊庖廩藏酒僧
徒減獲傭保馬牛之舍凡若干間其中像設之儀售
用之具一無闕者長慶五年春作大和元年秋成輪
奘莊嚴星環綦布如自地湧若從天降供施無虛日
鍾梵有常聲四無知歸萬人改觀於是增上慢者起
敬種善根者發心利喜饒益巨能具備若非大師於
福智僧中而得第一若非侍中於敬信人中亦為第
一則安能大作佛事而中興像教者乎故如來所謂
我滅後我法傳授於弟子囑於大臣斯言信矣師以

大和八年十二月十九日齋時終於本寺本院是月
二十九日道俗衆萬輩恭敬悲泣備涅槃威儀遷全
身歸于湖西磚塔遵本教而奉先志也報年七十僧
臘五十有一始出家訖于遷化志業行願道力化緣
引而伸之隨日廣大前後臨戒壇者八登律座者十
有五僧尼得度者三萬衆江淮行化者四十年歲疑
是人如來所使羅漢菩薩吾焉知之初大師以功德
為心既成而化侍中以撰錄見託未就而薨今按弟
子僧僧亮元素行狀序而銘之嗚呼所以滿大師之

願終侍中之志也銘曰

平地踊塔多寶示現險路化城遵師方便擊我大師
亦有大願像法是弘塔廟是建佛人交接兩得相見
法有毗尼衆有僧尼承教分佛得度於師宣傳戒藏
振起律儀四十餘載勤而行之福德如空不可思議
緣合而來功成而去如性不動色身無住張有遷化
非實滅度表塔勒銘門人戀慕

墓誌銘

醉吟先生墓誌銘并序

先生姓白名居易字樂天其先太原人也秦將武
安君起之後高祖諱志善尚衣奉御曾祖諱溫檢
校都官郎中王父諱錙侍御史河南府鞏縣令先
大父諱季庚朝奉大夫襄州別駕大理少卿累贈
刑部尚書右僕射先太夫人陳氏贈潁川郡太夫
人妻楊氏弘農郡君兄幼文皇浮梁縣主簿弟行
簡皇尚書膳部郎中一女適監察御史談弘譽三
姪長曰味道廬州巢縣丞次曰景回淄州司兵參
軍次曰晦之舉進士樂天無子以姪孫阿新為之

後樂天幼好學長工文累進士拔萃制策三科始
自教書郎終以少傅致仕前後厯官二十任食祿
四十年外以儒行修其身中以禮教治其心旁以
山水風月歌詩琴酒樂其志前後著文集七十卷
合三千七百二十首傳於家又著事類集要三十
部合一千一百二十門時人自為白氏六帖行於
世凡平生所慕所感所得所喪所經所過所通一
事一物已上布在文集中開卷而盡可知也故不
備書大曆六年正月二十日生於鄭州新鄭縣東

郭宅以會昌六年月日終於東都履道里私第春
秋七十有五以某年月日葬于華州下邽縣臨津
里北原祔侍御僕射二先塋也啓手足之夕語其
妻與姪曰吾之幸也壽過七十官至二品有名於
世無益於人褒優之禮宜自貶損我歿當斂以衣
一襲送以車一乘無用鹵薄塋無以血食祭無請
太常謚無建神道碑但於墓前立一石刻吾醉吟
先生傳一本可矣語訖命筆自銘其墓云

樂天樂天生天地中七十有五年其生也浮雲然其

死也委蛻然來何因去何緣吾性不動吾形屢遷已
馬已焉吾安往而不可又何足厭戀乎其間

塔銘

唐東都奉國寺禪德大師照公塔銘

并序

大師號神照姓張氏蜀州青神人也始出家於智
疑法師受具戒於惠萼律師學心法於惟忠禪師
忠一名南印即第六祖之法曾孫也大師祖述乃
宗神會而父事印其教之旨以如然不動而能以
妙然不空為用示真寂而不說斷滅破計著而不

壞假名師既為之碣以行梵出蜀入洛與洛人有
緣月開六壇僅三十載隨報設法言下多悟由是
裂疑網拔惑箭漸離我人相者日日有焉起止信
見本覺頓發菩提心者時時有焉其餘退惡進善
隨分而增上者不可勝紀夫如是可不謂煩惱病
中師為醫王乎生死海中師為船師乎嗚呼病來
盡而醫去海方涉而船失粵以開成三年冬十二
月示滅於奉國寺禪院以是月遷葬於龍門山報
年六十三僧夏四十四明年傳教主院上首弟子

沙門清閑糺門徒合財施與服勤弟子志行等管
度襄事卜兆於寶應寺荷澤祖師塔東若干步窆
而塔焉示不忘其本也其諸升堂入室得心要也
訣者有宗實在襄復儼在洛道益在鎮知遠在徐
建在晉道光在潤道威在潞雲貞在慈雲表在汴
歸忍在越會幽齊經在蔡智全景玄詔明在秦各
於一方分作佛事咸鼓鍾鳴吼龍像蹴蹋斯皆吾
師之教力也不其盛歟衆以余忝聞法門人結菩
提之緣甚熟請於塔石序而銘曰

伊之北西洛之東南法祖法孫歸全於中舊塔會
公新塔照公亦如世禮祔于本宗

白樂天文集卷之二十九

白樂天文集卷之三十

墓誌銘

唐故武昌軍節度處置等使正議大夫檢校
戶部尚書鄂州刺史兼御史大夫賜紫金魚
袋贈尚書右僕射河南元公墓誌銘并序

公諱積字微之河南人六代祖巖隋兵部尚書封
昌平公五代祖弘隋北平太守高祖義端魏州刺
史曾祖迺景岐州叅軍祖諱悱南頓縣丞贈兵部
員外郎考諱寬北部郎中舒王府長史贈尚書右

僕射妣滎陽鄭氏追封陳留郡太夫人公即僕射
府君第四子後魏昭成皇帝十五代孫也公受天
地粹靈生而岐然孩而嶷然九歲能屬文十五明
經及第二十四調判入四等署秘書校書二十八
應制策入三等拜左拾遺即日獻教本書數月間
上封事六七憲宗召對言及時政執政者疑忌出
公為河南尉丁陳留太夫人憂哀毀過禮杖不能
起服除之明日受監察御史使于蜀按任敬仲微
得情又劾奏東川師違詔條過籍稅又奏平塗山

甫等八十八家冤事名動三川三川人慕之其後
多以公姓字名其子朝廷病東諸侯不奉法東御
史府不治事命公分臺而董之時有河南尉離局
從軍職尹不能止監軍使死其柩乘傳入郵郵吏
不敢詰內園師械繫人踰年臺府不知知飛龍使
匿趙氏亡命奴為養子主不敢言浙右師封拔杖
安吉令至死子不敢愬凡此者數十事或奏或劾
或移歲餘皆舉正之內外權寵臣無柰何咸不快
意會河南尹有不如法事公引故事奏而攝之甚

急先是不快者乘其便相噪嗾坐公專達作歲黜
為江陵士曹掾居四年徙通州司馬又四年移號
州長史長慶初穆宗嗣位舊聞公名以膳部員外
郎徵用既至轉祠部郎中賜緋魚袋知制誥制誥
王言也近代相訟多失於巧俗自公下筆俗一變
至於雅三變至於與謨時謂得人上嘉之數召與
語知其有輔弼才擢授中書舍人賜紫金魚袋翰
林學士承旨尋拜工部侍郎旋守本官同中書門
下平章事公既得位方將行已志荅君知無何有

儉人以飛語構同位詔下按驗無狀上知其誣全

大體與同位兩罷之出為同州刺史始至急吏緩

民省事節用歲收羨財十萬以補工戶租其間因

弊制事贍上利下者甚多二年改御史大夫蒲東

觀察使將去同同之者幼鰥獨泣戀如別慈父母

遮道不可遏送詔使導呵揮鞭有見血者路聞而

後得行先是明州歲進海物其淡蚶非禮之味尤

速壞課其程日馳數百里公至越未下車越人

自越抵京師郵夫獲息肩者萬計道路歌舞之明

年辦沃瘠察貧富均勞逸以定稅籍越人使之無
流庸無通賦又明年命吏課七郡人冬築陂塘春
貯水雨夏溉旱苗農人賴之無餓殍在越八載政
成課高上知之就加禮部尚書降璽書慰諭以示
旌寵又以尚書左丞徵還改戶部尚書鄂岳節度
使在鄂三載其政如越太和五年七月二十二日
遇暴疾一日薨于位春秋五十三上聞之軫悼不
視朝贈尚書左僕射加賻贈焉前夫人京兆常氏
懿派有聞無祿早世生一女曰保子適校書郎常
綸今夫人河東裴氏賢明知禮有輔佐君子之勞
封河東郡君生三女曰小迎未笄道衛道扶齟齬
一子曰道護三歲仲兄司農少卿積姪御史臺主
簿某等銜哀襄事夫人常氏長女泉諸孩等號護
齋翼以六年七月十二日祔塋於咸陽縣奉賢鄉
洪瀆原從先宅兆也公著文一百卷題為元氏長
慶集又集古今刑政之書三百卷號類集並行於
代公凡為文無不臻極尤工詩在翰林時穆宗前
後索詩數百篇命左右諷詠中宮呼為元才子自

六宮兩都八方至南蠻東夷國皆傳寫之每一章
一句出無脛而走疾於珠玉又觀其述作編纂之
旨豈止於文章刀筆哉實有心在於安人治國致
君堯舜致身伊臯耳抑天不與耶將人不幸耶予
嘗悲公始以直躬律人勤而行之則坎壈而不偶
謫瘴鄉凡十年髮班白而歸來次以難進濟世變
而通之又齟齬而不安居相位僅三月席不煖而
罷去通介進退卒不獲心是以法理之用止於舉
一職不布於庶官仁義之澤止於惠一方不周於
四海故公之心不足也逢時與不逢時同得位與
不得位同富貴與浮雲同何者時行而道未行身
遇而心不遇也執友居易獨知其心以位濡翰書
銘于墓曰

嗚呼微之年過知命不謂之夭位兼將相不謂之小
然未康吾民未盡吾道在公之心則為不了嗟乎武
道廣而俗隘時矣夫心長而運短命矣夫嗚呼微之
已矣夫

唐故虢州刺史贈禮部尚書崔公墓誌銘并序

唐有通四科達三教者曰惟崔公公諱玄亮字晦叔其先出於炎帝至裔孫穆伯受封於崔因而命氏漢初始分為清河博陵二祖故其後稱博陵人曾祖悅洛州司戶參軍贈太子少保祖光迪贈贊善大夫考杭揚州司馬兼通事舍人贈太子少師妣太原王氏贈晉陽郡太夫人公即少師季子解褐補秘書省校書郎宣越二府奏授協律郎大理評事朝廷知其才徵授監察轉殿中厯侍御史膳部駕部員外郎洛陽令密州刺史公既至察密民

之凍餒者賑卹之疾疫者救療之嚙齧未殞者命塋藏之男女過時者越嫁娶之三月而政立二年而化行密人悅之歆於謠詠換歆州刺史其政如密先是歆民畜牛馬而生駒犢者官書其數吏緣為奸公既下車盡焚其籍孳息貨易無一所問先是歆民居山險而輸稅米者擔負跋涉勤苦不支公許其計斛納給賤入貴出官且獲利人皆忘勞農人便之歸如流水朝廷聞其政徵拜刑部郎中謝病不就俄改湖州刺史政如密歆加之以聚羨

財而補逋租則人不困謹茶法以防黠吏則人不
苦脩堤塘以備旱歲則人不饑罷祗賴之如伊父
母入為秘書少監改曹州刺史兼御史中丞謝病
不就拜太常少卿遷諫議大夫屢上封章言行職
舉上召對加金紫以獎之倣貂蟬以寵之未幾朝
有大蠹人心惴駭勢連中外衆以為寃百辟在庭
無敢言者公獨進及雷危言觸鱗天威赫然連叱
不去遂置笏伏陛極言是非血淚盈襟詞竟不屈
上意稍悟容而聽之卒使罪疑唯輕實公之力既

而真拜因旌忠直繇是正氣直聲震耀朝右縉紳
者賀皆曰國有人焉國有人焉公以為名不可多
取退不必待年決就長吉徑連歸路朝廷不得已
在途拜太子賓客分司東都公濟流有田洛下有
宅勸誨子弟招邀賓朋以山水琴酒自娛有終焉
之志無何又除虢州刺史蓋執政者惜其去將欲
馴致而復用之大和七年七月十一日遭疾薨于
虢州爾舍天子廢朝一日贈禮部尚書同行士
聞者相吊宗族交友靡不出涕遺直遺愛公兼有

馬烏虜公之將終也遺戒諸子其書大略云吾年六十六不為無壽官至三品不為不達死生定分何足過哀自天寶已還山東士人皆改葬兩京利於便近唯吾一族至今不遷我歿宜歸全于滄陽先塋正首丘之義也送終之事務從儉薄保家之道無忘孝悌吾玉軫琴留別樂天請為墓誌云爾夫人范陽盧氏先公而歿有子九人長曰焜通事舍人次曰芻言罕言舉進士次曰緩中牟尉其下皆幼稚焜等哀毀孝敬號護孺嬰以九年四月二十

八日用大塋之禮歸窆于磁州昭義縣磁邑鄉北原遷盧夫人而合祔焉遵禮命也公之丁少師憂也退居高郵其地卑濕泣血卧苦者三載因病痺其兩股焉逮于終身竟不能趨拜從祖弟仁亮竄謫已南歿而後歸公先命長男焜護喪歸塋後命幼子聽繼絕承祧自宗族及朋執間有死無所歸孤無所依者公或祭之塋之或衣之食之或婚之嫁之侯齊二家之類是也故閨門稱其孝群從仰其仁交遊服其義可不謂德行乎公幼嗜學長善

屬文以辭賦舉進士登甲科以書判調天言入上等前後文集凡若干卷尤工五言七言詩警策之篇多在人口其餘制述作者許之可不謂文學乎公之典密歛湖也理化如彼可不謂政事乎居大諫劇省也忠謹如此可不謂言語乎公夙慕黃老之術齋心受籙伏氣鍊形暑不流汗冬不挾結膚體顏色冰清玉溫未識者望之如神仙中人也江湖三歲歲修三元道齋輒有彩雲靈鶴迴翔壇上久之而去前後致齋七八而鶴來儀者凡三百六

十三內修外感也如此可不謂通於大道乎公之晚年又師六祖以無相為心地以不二為法門每遇僧徒輒論真諦雖耆年宿德皆心服之及易簀之夕大怖將至如入三昧恬然自安仍於遺疏之末手筆題云暫榮暫悴敲石火即空即色眼生花許時為客今歸去大曆元年是我家解空得證也又如此可不謂達於佛性乎揔而言之故曰通四科達三教者也居易不佞辱與公遊者三十餘年年老分深定為執友况奉遺札託為斯文且慙鄙

陋不敢辭讓銘曰

滄水之陽鼓山之下吉日吉土載封載樹烏虜博陵
崔君之墓

唐故溧水縣令太原白府君墓誌銘

并序

公諱季康字某太原人秦武安君起之裔胄北齊
五兵尚書建之五代孫也曾祖諱士通皇朝利州
都督祖諱志善尚鑿奉御父諱鱗揚州錄事參軍
公即錄事府君次子歷華州下邳尉懷州河內丞
徐州彭城令江州潯陽令宿州虹縣令宣州溧水

令沒于官舍明年某月某日歸葬于華州邽縣某
鄉某原享年若干烏虜公為人溫恭信厚為官真
白嚴重友于兄弟慈于子姪鄉黨推其行交游讓
其才自尉下邳至宰溧水皆以潔廉通濟見知於
郡守流譽於朋寮才不偶時道屈於位而徒勞於
州縣竟不致於青雲今矣夫哀哉公前夫人河東
薛氏先公若干年而歿生二子一女女號鑿虛未
笄出家長子某杭州於潛尉次子某睦州遂安尉
後夫人高陽敬氏父諱某某官生一子二女女皆

早天子曰敏中進士出身前試大理評事歷河東
鄭滑邠寧三府掌記夫人在室以孝敬奉親為淑
女既嫁以柔和睦夫為順婦及主家以慈正訓子
為賢母故敏中遵其教飾其身升名甲科歷聘公
府以文行稱於衆以祿養榮於君雖自有美材然
亦由夫人訓導之所致也天人以大和七年正月
某日寢疾終於下邳別墅享年若干明年某月某
日啓溧水府君薛夫人宅兆而合祔焉禮也時諸
子盡歿獨敏中號泣襄事託從祖兄居易誌于墓

石銘曰

繫我叔父溧水府君治本於家事施政於縣民繫我
叔母高陽夫人德修於室家慶積於閨門訓著趨庭
善彰卜鄰故其嗣子休有令聞

唐銀青光祿大夫太子少保安定皇甫公墓

誌銘 并序

公姓皇甫諱鏞字緜卿始封祖微子也周克殷封
于宋九代至戴公之子曰皇父因字命戴公族為
皇父氏至秦徙茂陵改父為甫及漢遷安定朝那

其後為朝那人五代相珍義資建二州刺史曾祖
文房高陵令祖鄰幾贈汝州刺史考瑜累贈尚書
左僕射太子太保妣洛陽賈氏贈姑臧郡太夫人
公由進士出身補夏陽主簿試左武衛兵曹充宣
歛觀察推官轉大理評事詔徵授監察御史改以
書郎殿中侍御史內供奉始賜朱綬銀印充鳳翔
節度判官營田副使旋又徵還真拜殿內監北部
負外郎河南令都官郎中河南少尹歷太子左右
庶子並分司東都俄又徵拜國子祭酒未幾別疾

改太子賓客轉秘書監分司又就拜檢校左散騎
常侍兼太子賓客轉秘書監分司始加命服正三
品又遷太子少保分司封安定縣開國男食邑三
百戶始立家廟享三世公先娶博陵崔氏後娶范
陽盧氏二夫人皆有淑德先公而歿有二子曰敬
曰珽一女適太原王諲以開成元年七月十日寢
疾薨于東都先教里第享年七十七皇帝廢朝一
日是歲十月三日用大塋之禮歸全於河陰縣廣
武原從太保府君先塋以盧夫人合祔焉公自將

仕郎累階至銀青光祿大夫自武騎尉累勲至上
柱國自布衣而佩服金紫自旅食而廟饗祖考封
爵被乎身褒贈及乎先官品蔭乎後大其門肥其
家儒者之榮無闕焉皆求已稽古之力自致耳公
為人器宇甚弘衣冠甚偉寡言正色人望而敬之
至於燕遊觴詠之間則其貌溫然如春其心油然
如雲也初元和中公因郎官分司東洛由是得伊
嵩趣愜吏隱如心故前後歷官八九凡二十有五
年優游洛中無哂笑意志喪窮達與道始終澹然

不動其心以至于考終命聞者慕之謂為達人當
憲宗朝公之仲居相位操利權也從而付鹿者有
之公獨超知雖貴介之勢不能及及仲之失寵得
罪也從而緣坐者有之公獨皎然雖骨肉之親不
能累識者心伏號為偉人公好學善屬文充工五
言七言詩有集十八卷又著性言十四篇居易屬
與公遊迨二紀矣自左右庶子歷賓客訖於少保
傅皆同官東朝分務東周在寮友間聞知家熟故
得以實錄誌而銘曰

賢哉少保令聞令儀金壁其體鸞鳳其姿德如斯壽
如斯位如斯嗚呼人爵天爵實兼有之廣武之原大
河之湄龜告筮從吉士良時封于茲樹于茲嗚呼少
保之墓百代可知

唐故銀青光祿大夫秘書監曲江縣開國伯
贈禮部尚書范陽張公墓誌銘并序

公諱仲方字靖之其先范陽人晉司空茂之先後
永嘉南遷始徙居于韶之曲江縣後因家焉唐朝
太常卿諱弘愈公之曾祖也嶺南節度使廣州

史殿中監諱九臯公之王父也贈尚書右僕射諱
抗公之皇考也贈潁川郡太夫人陳氏公之皇妣
也郡昌令仲瑞以下四人公之兄也監察御史仲
寧以下二人公之弟也博陵郡夫人崔氏公之夫
人也右清道率府司馬景宣進士茂女明經周
公之子也監察御史東行揚獬校書郎陸賓公
之婿也公即世稱府君第五子也貞元中進士舉
及第懷學進士科初補集賢殿校書郎丁內憂喪
除復補正字遷授咸陽尉鄜坊節度使辟為判官

奏授監察御史東行俄而真拜歷殿中轉侍御史
倉部員外郎金州刺史度支郎中駁宰相事議出
為遂州司馬移復州司馬俄遷刺史改曹州刺史
河南少尹鄭州刺史入為諫議大夫福建觀察使
兼御史中丞徵還為太子賓客再為左散騎常侍
京兆尹華州刺史兼御史大夫秘書監勳至上江
國階至銀青光祿大夫封至曲江縣開國伯食邑
四百戶開成二年四月某日薨于上都新昌里第
詔贈禮部尚書以某年八月某日歸葬于河南府

某縣某鄉某原村僕射府君之封域焉公幼好學
長善屬文待取科第如拾地芥著文集三十卷藏
於家纂制詔一百卷行於代尤工五言章句詩家
流稱之嘗撰先僕射府君神道碑文丞相文獻始
興公廟碑由文得禮秉筆者許之文獻始興公九齡
即公之伯祖開元中以儒學詩賦獨步一時及輔
弼明皇帝號為賢相餘慶濟美宜在於公公其
業襲其文而不嗣其位惜哉矧公為人溫良冲淡
恬然有君子德立朝直清貞諒肅然有正人風在

官寬重易簡綽然有長吏體為子弟恭敬為伯父
慈和與朋友信寵辱不驚其心喜愠不形於色入
仕四十載歷官二十五享年七十二才如是祿如
是壽如是宜哉居易與公少同官老同游結交慕
德久而彌篤故景宣等以論撰先德見此為文式
序且銘勒于墓石銘曰

在唐張氏世嘉儒宗文獻既沒鬱生我公我公漂漂
學異詞雄緣情體物有文獻風慶襲于家道積厥躬
峻足逸翮天驥冥鴻始自筮仕迄于達官六刺藩部
再珥貂蟬大諫選重二京才難賓于望苑寵在蓬山
凡所踐歷皆有可觀終然允臧已矣歸全嗚呼洛郊
北阡印阜西原佳城一閉陵谷推遷所不泯者令名
藹然

海州刺史裴君夫人李氏墓誌銘

并序

夫人贊皇縣君李氏趙郡高邑人也六代祖素立安
南都護五代祖休烈趙州刺史高祖諱至遠天官侍
郎魯祖畬國子司業祖諱承工部尚書湖南觀察使
考諱潘門下侍郎同平章事贈工部尚書夫人諱娥

相國長女也適河東裴君克諒今為海州刺史子曰
左衛騎曹參君一女適隴西李遂遂為壽州錄事
參軍由此而上得於國史家諫云夫人為相門女邦
君妻不以華貴驕人能恭儉克已撫下若子敬夫
如賓衣食之餘傍給五服親族之飢寒者又有餘散
霑先代僕使之老病者又有餘分施佛寺僧徒之不
足者澣衣菲食服勤禮法禮法之外諷釋典持真言
棲心空門等觀生死故治家之日欣然自釋捐館之
夕恬然如歸寶曆三年三月一日疾終于海州官第

其歲十一月十四日歸祔于某所先塋享年五十有
四夫人之從裴君也歷官九任凡三十一年族睦家
肥輔佐之力也由此而上得於裴君狀云夫源遠者
流長根深者枝茂噫李氏之世錄世德有所從來矧
相國端方廉雅孝友忠肅自從事彭城登庸宰府不
以夷險而遷其道宜乎居極位享名賢也夫人敬恭
勤儉柔順慈惠自女於室婦於家不以初終而怠其
行宜乎啓封邑光德門也裴君修文達政潔已愛人
自幼從邑軍連牧二郡不以寒暑而易其心宜乎荷

百祿號良二千石也嗚呼非此父不生此女非是夫
不稱是妻斯所謂類以相從合而具美者也論譔表
悲其可闕乎銘曰

高邑之祥降於李氏相門之慶鍾于女子女子有行
歸我裴君君亦良士宜賢夫人夫人雖歿風躅其存
勒名泉戶作範閨門

白樂天文集卷之三十